

亡命數萬人寇掠郡境官軍擊之不利須陀發兵拒之簿遂引軍南轉掠魯郡須陀躡之及于岱山之下簿恃驟勝不設備須陀選精銳出其不意擊之簿衆大潰因乘勝斬首數千級簿收合亡散得萬餘人北渡河須陀追之至臨邑復破之斬五千級時天下承平口父多不習兵須陀獨勇決善戰長於撫馭得士卒心號爲名將

**蕭瑄**南梁之裔文帝時爲千乘尹擢青州刺史習憲章有惠愛篤信在民旣歿民立祠祀之

**唐鄧景山**曹州人至德初擢青齊節度使爲政簡肅後以討劉展功拜尙書左丞

**王承元**文宗時爲平盧淄青節度使始鹽禁未嘗行兩河承元請歸有司由是兗鄆諸鎮皆奉法

**劉仁軌**汴蔚氏人太宗時遷給事爲李義府所惡出爲青州刺史

**尹思貞**京兆長安人中宗時爲青州刺史治州有績蠶至歲四熟黜陟使路敬表其善政召授將作大匠

孔齊卿宣聖三十七代孫爲青州司馬參軍甚有治才

**王昕**開元間青州刺史濟人利物綽有能聲

**崔玄亮**磁州昭義人唐貞元中進士累署諸藩幕府元和初召爲監察御史歷駕部員外郎清慎剛介特遷密州刺史朝廷推重拜散騎常侍

**劉玄佐**滑州匡城人德宗時李洧爲李納之攻玄佐受詔援洧大破納兵進圍濮州狗濮陽皆下之遷檢校兵部尚書兼曹濮觀察淄青交鄆招討使

希烈反玄佐與諸將聯兵數困之尋遷檢校司徒

**李邕**字泰和揚州江都人開元中爲淄州刺史上計京師以讒媚出爲北海太守文章書翰俱重於時蚤有雅名剛毅忠烈重義愛士李林甫忌之坐以罪詔就郡校殺之杜甫知邕負謗死爲作八哀詩傷之

**趙居貞**玄宗時爲北海太守文章政事爲時所稱

**劉敞**和嘗爲淄川長山鄒平令皆有聲後徙高苑適歲饑開倉賑民民歌曰高苑之樹枯已榮淄川

之水渾已澄長白之山草已青鄒平之民什已行述其德政樹碑於縣治

**五代梁王檀**京兆人初事梁太祖爲小校梁兵攻王師範檀以一軍破密州拜刺史後徙鎮太平

**晉馬胤卿**爲青州刺史遼兵至堅守不降城破被執遼主義而釋之

**顏衍**兗州曲阜人交國公四十五代孫少苦學治左氏春秋梁龍德中授北海主簿以治行聞再調臨濟多淫祠有針姑廟者里人奉之尤篤衍至即

焚其廟衍東歸房知温鎮青州復辟置幕下知温陰懷多不法衍每言之不避晉祖召爲工部郎中樞密直學士俄廢樞密院以本官奉朝請踰年上表請還侍養授青州行營司馬

**漢劉璠**渤海人漢乾祐間爲益都主簿性清介寡合能其苦淡後仕宋歷官轉運使

**宋馬仁瑀**夏津人開寶元年爲密州防禦使藝祖征晉陽命仁瑀率衆巡邊至上谷漁陽虜素聞其名不敢出明年群盜嘯聚兗州渠魁張勣兗悍自

號長龍詔擊之仁瑀領帳下數十人入寨擒弼盡獲其黨魯遂寧

**張敦禮**神宗時爲密州觀察使元佑初上疏言變法易令始於王安石成於蔡確近者退確進司馬光以臣觀之所得多矣進武勝軍留候

**唐義問**江陵人初知齊州哲宗時提點京東刑獄河北轉運副使歸邑尉因捕盜誤遺火盜逸去民家被焚訟尉故縱火郡守執尉抑使服義問辨出之方旱而雨

**劉獻可**寧陵人太祖時以諫議大夫出知青州性淳謹清介勤於政理安戢下民終戶部尙書

**樂崇古**封丘人太宗時調臨淄主簿尋轉爲令明習文法清白勤事累遷司農少卿

**戚綸**楚丘人興國八年進士解褐沂水主簿按版籍得逋戶脫口漏租者甚衆真宗時知青州歲饑發公廩以救多所全活郡民德之

**張知白**滄州清池人真宗時爲右司諫朝制重內輕外請補外不許命糾察在京刑獄知白固請出

知青州

**凌策**宋州涇人神宗時知青州性質淳和臨事彊濟一方賴之以寧超拜都官郎中

**陳執中**南昌人仁宗時知青州請城傳海諸州詔不許執中卒城之明年沂卒王倫叛趣淮南執中遣巡檢傅永言捕殺之召拜叅知政事

**李仕衡**成紀人真宗時為河北都轉運使潁州苦水患仕衡奏徙之明年蝗旱發積粟賑民遷工部侍郎後知青州能捕盜入為三司使

**田**青州安人以龍圖閣直學士知青州城中有殺人投屍井中者喻廉得之大出金帛搆賊後數日隣州民執賊以告歸獄之者益痛立賞罰設法畧捕格之境內肅然

**鄧維**安州人神宗時知青州時方散青苗錢辨言但見其害不忍民無罪而陷法網引疾投關提舉鴻慶宮

**程師孟**吳人神宗時知青州為政簡嚴摘姦誅惡所部舉安

字文昌，益州雙流人。神宗時，歷知鄆、青二州。徽宗時，以戶部侍郎再知青州。前後俱有聲績，郡多頌之。**張舜民**，字芸叟，邠州人。王安石倡新法，舜民上言：裕民所以窮民，強內所以弱內，辟國所以蹙國，以堂堂之天下而與小民爭利，可耻也。時人壯之。元豐中，討西夏五路山兵，還慶卽高遵裕，辟掌機宜。文字王師無功，舜民在靈武，詩有白骨似沙沙，似雪之句，謫監邕州鹽米倉。改監柳州酒稅，會赦北還。司馬光薦其才氣秀異，剛直敢言，以館閣校勘爲監察御史，累遷直秘閣，知青州。

**曾布**，南豐人。元祐間，以龍圖閣直學士出鎮青州，民甚德之。

**曾孝序**，靖康初，知青州，繕治城池，訓練士卒。儲峙金穀有數年之備，金人不敢犯。高宗召赴行在，青民借留許之。

**王博文**，濟陰人。真宗時，知密州，負海有鹽場，歲饑，民兵多盜，鬻吏捕之，輒抵死。博文請弛鹽禁，候歲豐乃復從之。

**孫奭**博平人太宗時爲莒縣主簿上書願試講說遷大理評事後復知交州

**翟汝文**丹陽人徽宗時嘗知齊州後徙密州密負海產鹽蔡京屢變鹽法盜販者衆有司窮治黨與汝文悉縱之密歲貢牛黃汝文曰牛失黃輒死非所以惠農宜輸財市之則其害不私於密上從之  
**孫洙**字巨源廣陵人包拯歐陽脩吳奎舉應制科進策五十篇指陳政體明白剴切韓琦讀之太息曰痛哭流涕極論天下事今之賈誼也神宗時王

安石主新法多逐諫官洙知不可而鬱鬱不能有所言但力求補外得知海州免役法行常平使者欲加歛緡錢以取贏爲功洙力爭之方春旱發運使調民濬漕渠以通鹽舸洙持之不下三上奏乞止其役旱蝗爲害致禱於朐山徹奠大雨蝗赴海死

**楊澈**家世建陽父思進晉天福中北渡海因家於青澈幼聰警七歲讀春秋左氏傳即曉大義建隆初舉進士補河內主簿再遷青州司戶參軍知州

張全操多不法澈鞠獄平允無所阿畏太祖知其名召試禁中改著作佐郎出知渠州後遷右贊善大夫知淄州事親以孝聞求便侍養徙通判青州三遷祠部員外郎復知淄州

**劉廷式**濟州人神宗時通判密州與蘇軾同時有能聲嘗娶盲不毀君子重之

**王存**丹陽人幼喜讀書年十二辭親從師下江西五年始歸時方尚雕篆獨爲古文數十篇鄉達見之自以爲不能慶曆六年登進士第調嘉興王簿

擢上虞令豪姓殺人久莫敢問存至按以法吏受豪賂賂他官變其獄存反爲罷去久之陰密州推官修潔愛民爲歐陽脩呂公著趙槩所知

**竇舜卿**安陽人仁宗時爲青淄路都監海盜行劫執博昌鎮官吏肆剽掠舜卿募士悉擒之

**郝仁瑀**仁宗時爲青州兵馬都監京東轉運使濟交間多閑田時仁瑀知田事乃請規度水利募民耕墾從之

**張拔**歷城人拔幼篤孝父蘊病割股肉以療之舉

進士慶曆四年知益都縣當督賦租置里胥弗用  
民皆以時入石介獻息民論請以益都為天下法  
**陳次升**興化仙游人神宗時知安丘轉運使吳居  
厚以聚斂進檄尉罔征稅於遠郊得農家敗絮捕  
送縣次升縱遣之居厚怒將被以文法會御史中  
丞黃履薦為監察御史

**毛注**西安人舉進士徽宗時知高苑縣以治辨稱  
吳執中薦為御史

**金完顏伯嘉**北京路人章宗時為莒州刺史讞屬  
縣盜疑其詞曰饑寒為盜得錢二千經月不使一  
錢云何此必官兵捕他盜不獲誣以準罪耳詰之  
果然

**燕寧**初為莒州提控以破紅襖賊功累官山東安  
撫副使封東莒公益都路隸焉與蒙古綱保全東  
方以功遷金紫光祿大夫

**田琢**蔚州定安人宣宗時歷山東東西路轉運使  
權知益都府事時李旺據膠西張聚據棣州李全  
據安丘琢督兵征討悉破之山東諸郡縣賴以保

全

**蒙古綱**咸平人章宗時權山東宣撫副使改山東路統軍事嘗奏赦揚安兒餘黨從之後徙知東平府尋權叅知政事復奏募選益兵會益都桃林寨張林侵掠東平綱遣王廷玉督兵踵擊大破之詔以綱保全東平

**郭建義**州弘政人天會間為益都令廉明穎異吏民畏服累遷濰州通判

**水甲良弼**泰和間為益都令惠愛及民民思戴之

**高通**皇統十九年為高苑令時潞水自華不注山東北入大清河偽齊劉豫迺導之東行為小清河運鹽初行高苑北北窪水患通改由縣南長沙溝又壘土為堤捍城民不告勞迄今猶懷其惠

**聶朝散**益津人明昌七年知沂水縣蒞政公平善發姦伏旱潦祈禱輒應屢致豐年

**完顏邦用**益都主簿綽有能聲

**吳德彰**世宗時為臨朐主簿政行化洽時益都屬邑飛蝗為災獨不入境大旱輒雨歲乃大熟

女奚列守愚章宗時爲臨沂令有不逞輩五百人結爲黨社大擾境內守愚至皆散去蝗起莒密間獨不入境先是朝廷括河朔山東地隱匿者沒入官告者給賞莒州刺史教其奴告臨沂人冒積賞錢三百萬皆徵於民民苦之守愚列其狀聞於戶部而徵還之流民歸業人勸其事於石

**完顏君佐**爲益都尉盜息民安時人稱之

**元董文炳**俊長子中統初宣慰燕南諸道還奏民久弛縱一旦遽束以法不可宜赦天下與之更始

世祖從之三年李壇反濟南文炳會諸軍圍之壇不得遁久之賊勢日蹙文炳曰窮寇可以計擒乃抵城下呼壇將田都曰反者壇耳餘來即吾人毋自取死田縋城降壇之愛將旣降衆遂亂擒壇以獻壇兵有浙漣兩軍二萬餘人勇而善戰主將怒其與賊配請軍使陰殺之文炳當殺二千人言于主將曰彼爲壇所脅耳殺之恐乖天子仁聖之意向天子伐南詔或妄殺人雖大將亦罪之是不宜殺主將從之壇伏誅山東猶未靖乃以文炳爲

山東東路經畧使率親軍以行出金銀符五十有功者聽與之文炳至益都留兵于外從數騎府不設警衛召壇故將吏立之庭曰狂賊誑誤汝等壇已誅死汝皆爲上民天子至仁聖遣經畧使撫汝當相安毋懼汝等勉取金銀符經畧使不敢違上命不予有功者所部大悅山東以安

**蓋苗**字耘夫大名元城人爲山東廉訪副使益都淄萊地舊稱產金朝廷建一府六所綜其事民歲買金以輸民有忤官長意輒謂居地有金鑛掘地及泉而後止猾吏爲姦利莫敢誰何苗建言罷之

**張俊**順帝時爲山東行樞密知院性沉靜有知謀善用兵大明兵攻益都俊悉力拒守城破携妻子投井死

**來阿八**赤寧夏人世祖時授益都等路宣慰使都元帥發兵萬人開運河往來督視寒暑不輟有兩卒自傷其手以示不可用乃檄樞密并行省奏聞斬之運河旣開遷膠萊海道漕運使

**王磐**永年人世業農歲得麥萬石鄉人號萬石王

家磐方弱冠從麻九疇學于郟城客居貧甚日作糜一器晝爲朝暮食年二十六登正大四年經義進士授歸德府錄事判官不赴益肆力於經史百氏文辭宏放中統初拜益都等路宣撫副使頃之以疾免李瓊素重磐以禮延致之樂青州風土乃買田洱河之上題其居曰鹿菴有終焉之意及瓊謀不軌磐覺之脫身至濟南馳入京師因侍臣以聞世祖即日召見嘉其誠撫勞甚厚

**顏潛**顏子四十八代孫順帝時授益都路元帥府

宣慰使子惠保愛民甚誠之

元統二年除益都路總管齊俗頗悍黠都刺務興學校以平易治之賊有白晝劫入者久不能捕都刺得計生擒之其黨賂宣慰使羅鍋誣以枉勘縱其賊已而賊劫河間復被獲乃盡輸其情詣都刺之誠始曰親土買奴銷益都其府屬病民詣都刺裁抑之民遂不擾

**范元澤**東平人至元間爲益都路總管政著能聲禱雨輒應民懷其德

撒吉思回鶻人授山東行省都督選經畧統軍二使兼益都路達魯花赤辭不拜上言山東重鎮宜選貴戚臨之帝不許賜京城宅一區益都田千頃山東兵後民乏牛具歲屢歉爲請於朝發粟賑卹奏蠲其田租統軍抄不花田遊無度元帥野速答爾據民田爲牧地表聞皆治其罪東人刻石頌德

**真蹟**

至元四年任密州達魯花赤興學校勸農桑

召集耆宿問民疾苦蠲盜募年而政成廢舉秩滿州人述其德政立去思碑

**張守道** 大名人至元間知密州崇學振士政教大行民多率循禮義有化導之風

**孔冶** 宣聖五十三代孫至元間知密州廉潔自持門杜私謁戢姦除惡優卹困窮民甚德之

**賈濟** 祥符人至正間知密州值歲饑盜起陳救荒彌盜事各十餘條仍奏減價賑糶不俟報允先期發粟給民考績居最賜金帛褒獎比去民爲立碑頌德

**劉好禮** 恩州人順帝時知莒州教民禮義鋤姦彌

盜會旱且蝗致禱神祇雨降蝗滅輒應又嘗辨冤  
獄平反甚多及去郡民立石懷政

**樂汝翼**大德間知博興州持已廉潔勤於撫字興  
學敷教民多化之

**郭充文**宗時知博興州表行義尊碩德政興廢舉  
賦役均平士民多畏服之

**司仲可**臨淄尹興學校闢田野均賦役盜賊止息  
囹圄空虛

**張德新**渤海人大德間為樂安尹廉能剛斷惠卹

小民卒于官

**秦泰**大德間為樂安尹公廉惠愛民不忍欺歷三  
十餘年卒於官德新與泰並祀蕭信公廟

**葛讓**至大初為高苑令歲大饑首捐俸以為眾勸  
更為多方移請設法賑餉民賴全活者無慮千數

**楊溫**為高苑尹至大元年大侵縣尹葛讓敬甫移  
文於縣與監縣公買任王簿楊汝梅議率公吏人

等首捐俸米以為眾勸所全活者無慮數千人士  
論偉之

王玠太原人爲壽光尹時歲凶盜起玠爲建亭習射練兵數月藝精器備盜不敢犯民賴以安

**李伯豪**商河人至元間爲壽光尹除積弊拯民艱勤政事決疑獄民賴以安及去爲之立石

**張貴**高苑人有膽畧膂力過人以待俊擢任本縣令適元末毛貴竊據山東群盜擁衆剽掠所過無遺邑無城盜起輒入貴奮不顧身以大義激鄉兵挑決壕塹創立營堡內安家衆外拒叛逆焚粟賑饑衆百姓賴以全活

**陳仲祥**中統間爲臨朐令操履端潔政事脩舉歲旱禱雨輒應隣境流離塞道祥乃使分居山崗時加賑卹全活甚衆每出入民皆遮道羅拜大都督保奏宜宣賜金帛授以金牌

**狄子英**中統間爲臨朐令廉潔勤慎賑饑有方民賴全活公餘杜門端坐手不釋卷聲色紛華淡無所好

**李善卿**爲臨朐尹脩學校決疑獄持已廉平勤於撫字民信愛之

田恭兗州人大德間以寧海判官遷安丘尹脩舉廢墜勤恤民隱尤加意於農桑學校士民愛服

段綺濱州人中統間爲昌樂尹撫字有方民皆安業秩滿民奏留加明威將軍仍知縣事

劉澤昌樂人元統間累建軍功後授懷遠將軍知本縣事存心忠愛政平訟理賢能著績

楊徽長清人元統間尹昌樂以興學育才爲務蒞政和平獄訟清簡民甚便之

武秀濟南人仁宗時以清譽擢爲蒙陰令經制有

方規畫盡法興學校勸農桑數年民愛戴之遷山東東路都轉運鹽使去後民爲立石頌德

苑華獻陵人仁宗時爲沂水尹蒞政廉勤處心公正興學勸農期年廢墜具舉政教洽和去後民思立石旌善

孔克紹宣聖五十五代孫文宗時爲沂水主簿存心愛民佐政有理甫二月縣事咸集尤加意學校邑人稱之

馬紹金鄉人世祖時僉山東東西道按察司事時

益都寧海大饑發粟賑之一方賴之以生

**路達**樂安人爲日照尹廉潔愛民政平訟簡興舉廢墜事集民安

**國朝趙麟**洪武初由監察御史知莒州長於文學廉公有爲凡廟學公署多麟修建稱賢守

**趙復**浙江鄞縣人洪武初知樂安性剛毅明斷如神雅鎮廉潔創修文廟橋梁公私不擾至今稱之  
**丁子仁**湖廣武岡人洪武中爲昌樂丞出政廉能吏民畏服秩滿民保奏陞知本縣後坐誣累民赴

京訴理陞登州府知府賜金幣旌其賢

**王鐸**陝州閿鄉人洪武間知壽光勸農桑興學校均賦役招逋亡恤貧乏代去吏民遮道泣留

**于潛**河南鄆陵人由監察御史謫知昌樂蒞政廉能革除姦弊興舉廢弛官至應天府尹

**朱允恭**陝西保安人知諸城廉靜寡欲治民得體以事被誣赴京民請闕奏保 上嘉其異遣使

敕勞復職尋卒於官民哀之

**張旗**山西榆次人洪武中知安丘會妖賊唐賽兒

攻安丘旗與縣丞馬撫率民兵八百以死拒戰賊  
敗復集衆攻城會衛青兵至旗出城中兵合擊大  
敗之卒全安丘事聞擢旗山東左叅政撫左叅議  
**孟迪**太原人由鄉貢性簡易所至不爲赫赫可喜  
態而陰惠默化雖刻意厲行者有所不能及知青  
州承積弊後振壅滯補隙漏各中機宜屬邑豪吏  
飾詐挾上流毒閭里廉得其狀斃于獄人大稱快  
歲比蝗迪語其佐曰民仰于農孽乃作畜咎在長  
吏即督屬捕之縮章戴星冒炎雨跋阡陌衆用競

勸患息歲稔每旱禱雨輒應期降成謂德政所感  
云旣而嘆曰救荒之政與其持之于未孰若備之  
于初乃勸民出粟備賑不督而集所屬以石計者  
五十餘萬終迪任未嘗病饑建市集通貿化均遠  
輸約嘗隸官師其廉吏懾其威有盜就擒堅不肯  
服一訊即輸仍諭其衆曰我知盜非人所欲爲但  
迫于饑寒者猶可憫若恃強爲之烏得不殺盜爲  
屏迹他若捐俸飾學敦獎士類科貢得人在郡十  
年德化大行

陳勛字功懋沔陽州人舉永樂庚子科鄉貢進士  
宣德初授吏部司務風采凝峻傾動縉紳能評品  
賢豪裨於用舍九載考最出守青州悉心撫循教  
民孝弟力田每行縣省耕繪爲勸農圖興學造士  
文行丕振詳在脩學碑中未幾患足疾乞骸骨去  
民有謠曰去陳府百姓苦庶幾哉去後思矣孫栢  
曾孫文燭世以文章政事顯蓋有自焉

**葉元凱**浙江麗水人正統間知沂水存心仁恕勤  
政愛民後卒於官民立祠祀之

**楊昕**括蒼人成化初知壽光廉教鯁直勇於去惡  
時有害民者號爲七虎莫可誰何昕悉按治之患  
息民安尋卒于官民立祠祀之

**趙偉**上黨人由鄉貢初判萊州卓有聲望天順二  
年用薦者言擢知青州先是郡治頽敝上兩旁風  
前守數輩視同傳舍苴罽支蠹苟若而可偉至度  
緩急節贏羨鳩材量工明年飾學宮以敦教化茨  
倉廩以廣儲蓄峙傳舍以待賓客政既有緒乃經  
其始又明年撤舊鼎新民不知疲堂陞秩秩下及

亭右銘戒藝植各有義意規畫宏遠矣說者謂偉  
廉明嚴厲蝥蝥補弊未及三年百廢具興遺風遺  
烈可爲後式

**李昂**字文舉仁和人天順甲戌進士成化二年知  
青州先是政弊民攜逃亡踵接昂至問疾苦首劾  
賊吏置于法暨諸積蠹一切廉去量貧富均繇役  
募民辟田而緩其課不能償者官代之輸值歲大  
饑昂捐帑分糴復愀然曰民已枵腹行將填壑其  
何及耶遂不請開廩以賑不足復移歲輸助之繼

勸富民粟爲粥以食餓者全活甚衆旣而法吏以  
不請開廩罪昂曰民旣生全罪復何憾自劾乞罷

上下部義 詔所移粟與輸官同特加獎慰昂尤

慮饑饉後民不能耕循行阡陌貸與之具其惇嫠  
無告者闢廬棲之時給服食問弔藥榘建漏澤園  
于關北俾托瘞焉殫心學校引進諸生躬加勸誘  
人才輩出教民五典飾申明旌善亭俾知懲勸孝  
節著白者奏旌其門俗用丕變流移復歸外封附  
者輻輳博興一邑至占三千餘戶父老嘆曰不圖

今日復見富公也走數千里求列其事于石尋參  
閩省政歷藩山東河南擢都御史巡撫江右繼督  
漕運昂嘗董軍餉興水利申法禁抑豪右所至得  
功而江右之功爲最洞寇陽九隆等倡亂勢張甚  
遠近大聳昂節制五省兵執訊夷險立巡司二總  
理叅將一方域以寧其在漕運條陳十事多關大  
體昂德政始于一郡終及六省兩淮而救荒之政  
青民迄今頌之比諸鄭公云

**衛述**山西蒲州人由舉人成化間知莒州廉明剛

果脩廢墜毀淫祠興學厲俗人不敢干以私在任  
十載及去民多思之

**張璉**河南鞏縣人成化間知臨朐歲大旱餓殍盈  
道璉勸富民出粟或自經畫民賴全活者以萬計  
逾年歲豐民乃樂業三載拜監察御史去後朐民  
有偶見者如見父母縉紳號爲張臨朐云

**馬亮**字文明直隸大成人由舉人成化間知樂安  
清慎嚴明門無私謁抑豪彊勸農桑賑饑乏人咸  
德之

方璈 四川簡縣人成化間知壽光歲饑盜起設法賑恤弭散民賴以安稱賢令

鄭珏 河南歸德人成化間知壽光撫綏有方流民復業者千餘戶興學勵才訟簡盜息民服其化

奚銘 字克新順天宛平人由進士成化間知樂安

蒞政清勤除弊懲姦賞罰明信興學校勸農桑百廢修舉民俗化之 內召擢監察御史

沈清 浙江歸安人由進士成化間知樂安廉明仁愛政教兼舉賦役均平在任三年訟簡盜息歲豐

足民文廟壇壝橋梁道途無不脩舉

趙 朔州文安人成化間知日照平易近民寬

猛適宜無有禱輒應民多賴之

繆 直隸人由進士拜監察御史以不避權

勢謫判甘肅州公勤廉直上允下懷卒於官民咸痛

之

張禮 山西石州人弘治間知博興剛正廉介暮年

境內晏然卒於官遠近如喪父母

周致 浙江鄞縣人弘治中知臨淄以清節自勵事

至立辨威惠竝施士民咸服爲邑令首稱嘗被檄署益都兩邑民爭之尋以公事至濟南得暴疾卒百姓哀悼立祠祀之

**馬維祖**

直隸如皋人弘治間知博興寬厚仁愛蒞政明敏歲饑懇疏當道悉力賑給民賴全活者甚衆

**何武**

河南靈寶人弘治間知博興天性鯁介勤政愛民化盜賊爲循良百姓歌之

**陳文偉**

廬州舒城人弘治間知博興剛正廉介吏

民畏服興學校課士徒導水利教民力田凶年賴活者甚多

**雷啓**

河南儀封人正德中知臨朐勤於蒞政寬

以恤民城邑兩經流賊殘破東方浚築城塹聚鐵鑄兵爲守備計纔十八日而城守之具已完聞流賊將逼城乃令鄉社之衆盡挈其家及芻粟入城清野待賊經營甫定而賊各擁衆驟至東督率丁壯捍衛號令嚴肅寂然無譁賊旣莫測城中所爲擄於野一無所得圍三日相與驚嘆去

李珣字廷重開州人弘治乙丑進士知青州儀觀  
端偉學識宏博政尚簡惠不事苛察訟者以情法  
諭之令其省改久之民輒戒曰吾寧自相輸輯毋  
令我公知也遷徐州兵備副使掌憲山西適搆大  
獄以執法不阿謫戍後起僉都御史巡撫遼東終  
大理卿

**牛鸞**字鳴世獻縣人正德戊辰進士任益都令時  
劇賊劉六等轉掠山東踰曹濮蹂淄澗所過城邑  
望風奔潰獨鸞與樂陵令許忠節公達東西遙應

此若巨鎮鸞尤臨機設變出入鬼神號稱異特賊  
嘗圍城三日鸞日夜距守賊歛兵退鸞曰此  
特自定計耳不一大創賊必復來乃駕子弟兵及  
請亡命躡賊戰大王橋身被四矢扶創疾鬪賊遂  
大奔斬獲無算賊自是不復東矣事聞擢按察司  
僉事整飭兵備青州開署自鸞始尋遷副使仍理  
兵務嘉靖初顏鎮賊王堂豪俠好施聚畔山谷每  
戰困衆脫之鸞挺身突入賊中賊覺鸞奮刃大呼  
賊衆披靡未幾就殄山西馬五寨賊首陳卿者據

山作亂數年不靖鸞奉 詔移兵平之即其地建  
平順縣鸞累平劇寇聲望赫然而懷竒負氣不能  
腆膺為詭隨熊世亦以此嫉鸞謝病不起終于家  
**徐縉**江都人弘治乙丑進士正德己卯知青州簡  
靜明敏剖決滯獄舉刺屬令唯廉其才否稍不便  
民者雖少年魏科庭責不貸闔郡輸服糾賊吏懲  
姦猾理侵漁卹夫役諸凡興革以身任之一日論  
大公開齊功竝周公獨無廟祀即五龍堂塑肖公  
像配以管晏歲時祭享慮傷民財毀無名寺觀以

充之或阻以鬼神禍福竟無所動激勸生儒敬業  
樂善敦尚氣節庭無私請士風為之稍振未幾卒

於官

**李欽**故城人正德辛未進士歷有治績擢知青

州儀容言動剛直不為澳忍府治清肅俗素強悍  
下車先榜諭之有不悛者始加懲治鞠訊獄情必  
察其強弱善惡而輕重焉有應戍者輒曰與其遣  
罪人而勞良民孰若重懲而令其悔悟自新也又  
之刁訟自息黎庶樂業以最調開封士民爭禁留

紀資任丘人嘉靖癸未進士丙申守青州言動質直遇事敢為獄訟清平豪右斂手屬吏有不自戢者必庭詰之嘗曰少年入仕情多恣傲上復優容是姑息也一時俊銳之士始不自堪卒賴以成立暇進諸生論釐文體崇雅黜浮科第自此漸盛擢按察副使歷死馬寺卿比退休惟舊田廬聊足自給愉如也士論鄉評咸推慕云

**劉廷儀**字汝修慈谿人嘉靖戊戌進士歷官監察

御史知青州惠愛不苛民多稱便性特耿介疾世之足恭及吏之貪墨闕茸者語及辭色輒厲衆憚而忌之時監司行縣至廷儀禮遇侃侃無屈容監司謂故御史態也呼之曰道長可謂悃悃無華矣何為沾沾自喜無少青州耶廷儀不為動竟以此失上官意在遷運佐青人惜之廷儀與人淡易至語經術聲不厭嘗以訓士子蓋能用之以飾治者青州治平不減良吏云

**潘鈇**字希行婺源人以刑部郎中知青州體貌清

癯若不勝衣日親案牘剖決無滯尤能以法制抑  
豪右人咸以食少事煩慮之官至叅政

**胡宗憲**字汝欽績溪人嘉靖戊戌進士倜儻不羈  
其宰益都嚴信賞罰而民服之上官行部至供億  
旁午閱戎課士動逾什百宗憲儲措有術歛不及  
民嘗勒稅限比至忽訪諸鄉大夫語合輒更僕不  
休或繼以柘杓弗拒也佯愕曰限也我忘之民其  
幸我耶姑俟來日民且畏且感輸報倍之其以寬  
濟撥類若此擢監察御史按兩浙以平倭功載擢

僉都御史終少保兵部尚書宗憲推心用間不吝  
千金歷剪巨寇徐海王直輩督兵數年東南賴以  
寧謐說者謂宗憲經畧已槩見益都云

**楊廷選**字仲芳容縣人嘉靖丁未進士慷慨有大  
節庚戌虜大入寇逆鸞挾虜要寵議開馬市以和  
輯之衆知其不可顧不敢諍繼盛時爲駕部員外  
郎即抗言北虜狼子野心恐辱國威罔裨邊計  
乞罷其議疏上謫知諸城先是鸞緣嚴少師嵩進  
比勢軋更相擠伺而嵩暨其子世蕃互爲姦利甚

人異已諸才名士輒媒致門下冀相引重繼盛既  
謫逾月復爲武選員外郎嵩更以好言啗之曰公  
天下士也行將銓曹矣屹不爲動未幾嵩孫鵠冒  
功廣中事下兵部繼盛奮然曰此吾職也即列其  
欺君誤國結黨紊政諸罪狀累數千言上之自  
嵩秉政前後論者不下十數顧未有繼盛之劄其  
肺腑者也上大感動留中數日嵩父子極力搆  
之因摘䟽中疑語論死上察無他議將釋矣復  
煽爲蜚語竟以乙卯九月晦棄市後十年而世蕃

伏誅嵩及諸孫削奪官職卒如繼盛言

**陳儒**

字汝宗錦水衛人嘉靖癸未進士歷任山東

左布政使癸卯歲提刑鄉試以誣誤被逮謫尋遷  
青州兵備僉事廉幹素著未至任而民畏之如神  
明蒞任數閱月四境肅然闔閭之間無敢夜行者  
能持大體不爲苛急吏民安焉陞光祿少卿仕至  
南京戶部尚書

**王世貞**

字元美太倉州人嘉靖丁未進士丙午任

兵備副使齊故多大姓竊采山煮海以相雄長其

徒附焉往往挾衆而扞上尋以璽書得辟持戟之士有徐子由者三檄不至衆謂按察君雖年三十老吏也乃率田而陳之郊計有它即爲變躬自入謝禽而置之法黨與解散先是微知其狀即爲備云嘗行部抵顏神謂此其聚一巖邑也吾聞在昔盜九倡亂莫不據此爲姦即生息蕩然有司者戍焉視猶暴之中野此爲役延石於宇下耳乃城顏神三月而就民甚便之

**楊和**

字節之固安人弘治中以鄉舉除青州府儒

學教授持身剛正條教嚴明士風丕變賢才彙出經術道義之學彬彬藹藹矣在任九年始終一節經紳傳頌以爲後先無比子維傑維聰俱幼學于此後金及第維誠領鄉薦家學相繼甲於京甸云

**補實**

字光楚中都鳳陽人嘉靖己丑進士令臨朐

文雅修潔治邑有聲尤加意黌序廟堂射圃書院多所修建公餘進諸生列坐析經論藝疊疊不倦城巷鄉村悉置小學擇師教之邑人無少長遠近皆知向學由是科名不乏自馬愉及第後至是寢

盛比去邑父老肖像建祠祀之門下侍郎遲鳳翔  
都御史張邦彥撰碑記甚詳見臨朐縣志

**浦楫**字濟川江陰人嘉靖中由選貢任府儒學訓  
導博文多識動履端謹教有程度遠近著聲他邑  
之士亦執經就講時副使王世貞極加禮重多士  
益勵咸樂卒業焉戊午歲領鄉薦者獨盛皆楫陶  
鑄之功嘗輯郡乘屬草粗就以憂去服闋補浙東  
猶輯藝文志若干卷旁搜博采必擇雅馴殆不愧  
古之作者

青州府志卷之十四

人物

齊稱梧臺樹因國大况士生其間耶周秦而下代  
有達者

皇運熙昌英賢輩出勲業行誼俱可稱列作人物  
傳

**周田嬰**齊威王少子自威王時任職用事及宣王  
九年以嬰為相相齊十一年湣王立封於薛子文  
以五月五日生嬰欲棄之母竊舉生之及長謂嬰

盛比去邑父老肖像建祠祀之門下侍郎遲鳳翔  
都御史張邦彥撰碑記甚詳見臨朐縣志

**浦楫**字濟川江陰人嘉靖中由選貢任府儒學訓  
導博文多識動履端謹教有程度遠近著聲他邑  
之士亦執經就講時副使王世貞極加禮重多士  
益勵咸樂卒業焉戊午歲領鄉薦者獨盛皆楫陶  
鑄之功嘗輯郡乘屬草粗就以憂去服闋補浙東  
猶輯藝文志若干卷旁搜博采必擇雅馴殆不愧  
古之作者

青州府志卷之十四

人物

齊稱梧臺樹因國大况士生其間耶周秦而下代  
有達者

皇運熙昌英賢輩出勲業行誼俱可稱列作人物  
傳

**周田嬰**齊威王少子自威王時任職用事及宣王  
九年以嬰為相相齊十一年湣王立封於薛子文  
以五月五日生嬰欲棄之母竊舉生之及長謂嬰

曰君相齊至今三王矣齊不加廣而君私家富累萬金門下不見一賢者文竊怪之於是嬰乃禮文使主家待賓客賓客日進名聲聞於諸侯立之嬰卒謚曰靖郭君

**子竒**齊人年十六齊君使治阿既而悔遣使追之使者反曰子竒必能治阿共載皆白首也子竒至鑄庫兵以作耕器魏以齊使童子治邑庫無兵倉無粟起兵擊之阿人父率子兄率弟以私兵戰遂敗魏師

**田文**嬰之子號孟嘗君在薛招致諸侯賓客及下人有罪者皆厚遇之食客數千人秦昭王聞其賢求見即以爲相既而欲謀殺之文以鷄鳴狗盜之計歸齊湣王以爲相孟嘗君任政怨秦乃借楚爲名與韓魏伐秦兵至函谷秦人震恐割地以與韓魏僅得免後湣王滅宋益驕欲去孟嘗君文乃如魏昭王以爲相西舍於秦趙與燕共伐齊襄王新立畏文與連和復親薛文卒諸子爭立而齊魏共滅薛

漢婁敬齊人衣褐說高帝曰關中沃野千里兵可具百萬可謂金城天府之國都之易以制東方諸侯帝從之賜姓劉氏拜郎中匈奴入寇帝親禦之使敬往覘虛實匈奴匿精兵見其老弱敬知其詐我言不可擊帝信其後覘者言不聽敬徑踰旬注果被圍平城七日始解帝思敬言乃封爲關內侯號建信君

**駟先生**齊人淮陽憲王舅氏張博遺王書曰聞齊有駟先生者善司馬兵法大將之才也博得見

竟要道方今邊疆弗寧天下騷動微此人莫能安也

**周堪**字少卿齊人事夏侯勝元帝時擢光祿勳與蕭望之並領尚書事以師傅見重數宴見言治亂事爲石顯所譖皆免官望之自殺上愍堪仍擢光祿勳

**諸葛豐**字少丞琅邪諸城人以明經爲郡文學剛直特立元帝擢爲司隸校尉刺舉無所避京師語曰間何闊逢諸葛上嘉其節進光祿大夫時外戚

許張貴幸奢淫豐奏劾之上不納免其官按姓源  
豐之先葛氏本琅邪諸城人後徙陽都陽都亦有  
姓葛者時人謂之諸葛三國時亮瑾誕恪融瞻尚  
恢璠皆豐之裔

**師丹**字仲公琅邪東武人初爲東平王太傅翟方  
進孔光舉丹議論深博廉正守道徵爲光祿大夫  
累遷大司空哀帝即位追尊定陶共王爲共皇帝  
傳太后爲共皇太后丁后爲共皇后丹抗議切諫  
以爲非所以明尊無二上重大宗承正統之義由

是不合上意遂罷歸明帝即位以丹執忠節據理  
法明尊卑之制可謂社稷之臣封義陽侯謚曰節

**吳良**

字大儀臨淄人爲郡吏歲旦與掾入賀門下

掾王望舉觴上壽謔頌太守功德良曰望佞邪之  
人欺諂無狀願勿受其觴太守歛容而止東平王  
蒼辟爲西曹又薦其資質敦固公方廉恪躬儉安  
貧白首一節明帝以爲議郎因劾信陽侯陰就倚  
恃外戚無人臣禮左轉爲即丘長後遷爲司徒長

史

牟融字子優北海安丘人少博學以尚書教授門徒數百人舉茂才為豐令永平中入為司隸校尉多所舉正百寮憚之後為司空融明經才高善論議舉動方重甚得大臣節肅宗朝為太尉參錄尚書事

**承宮**字少子姑幕人少為人牧豕會徐子盛以春秋授諸生宮過廬下因就聽講數年勤學不倦後躬耕蒙陰山永平中徵拜中郎將數納忠言朝臣憚其節名播匈奴北單于使來嘗求見之顯宗敕

自整飭宮對曰夷狄眩名非識實者也臣狀醜不可以示遠宜選有威容者乃以魏應代之官至侍中參酒

**滕撫**字叔輔北海劇人為涿令有文武才以其能任郡賊兼領六縣順帝末揚徐盜起拜撫為九江都尉討平之陞左馮翊所得賞賜盡分麾下性方直不交權勢宦官懷忿及論功當封太尉時胡廣錄尚書事承旨黜撫天下怨之

**周澤**字穉都北海安丘人少習公羊嚴氏春秋中

元初為滎池令奉公克已吏人愛之後拜太常果敢直言顯宗嘗以北地太守廖信贓物頒諸廉吏澤蒙賜焉於是在位者咸自勉勵

**滕延**字伯行北海人為濟北相時中常侍侯覽小黃門段珪在濟陰與濟北相近僕從賓客侵犯百姓劫掠行旅延一切收捕殺數十人陳屍道路覽珪大怒訴於帝坐免後為京兆尹有能聲

**琅邪**人少有術學延熹三年琅邪賊勞丙與太山賊叔孫無忌殺都尉攻沒琅邪屬縣殘害吏

民朝廷以南陽宗資為討寇中郎將仗鉞將兵督

州郡合討無忌彥為陳孤虛之法以賊屯在莒莒

有五陽之地謂城陽南武陽開陽並近莒宜發五陽郡兵

郡名有陽南陽廣陽漢陽南陽丹陽也從孤擊虛以討之資具

以狀上詔書遣五陽兵到彥推遁甲教以時進兵

一戰破賊燔燒屯塢徐充二州一時平夷

**二國任昭先**初名嘏樂安世族八歲喪母號泣不

絕十四始學群書無不綜覽比居擅耕嘏地數十

畝種之人以語嘏嘏曰我自以借之耳耕者聞之

慙謝還地邑中爭訟皆詣嘏質之其子弟有不順者父兄竊數之曰汝所行豈可令任君知邪其禮教化率如此會魏太祖創業召海內至德嘏應其舉爲臨淄侯庶子相國東魯屬尙書郎文帝時爲黃門侍郎帝嘉其淑慎累遷東郡趙郡河東太守所在化行嘏爲人淳粹豈弟虛已若不足恭敬如有畏脩身履義皆沈默潛行不顯其美故時人少得稱之著書三十八篇凡四萬餘言

**徐奕**

字彥才東莞人仕魏初爲掾屬從征馬超超

破時關中新服未安留奕爲丞相長史鎮撫西京  
稱其威信後爲東曹屬丁儀等害之奕終不爲動  
操謂奕曰君之忠亮古人不過然微太嚴昔西門  
豹佩韋以自緩未能以柔制剛者望之於君也操  
征漢中魏諷等謀反操歎曰諷敢生亂心以吾爪  
牙之臣無過焉防謀者安得有臣如諸葛豐者乎  
桓階曰徐奕其人也操以奕爲中尉手令曰楚有  
子玉文公爲之側席汲黯在朝淮南爲之折謀詩  
稱邦之司直君之謂與居職數月卒

徐盛字文檣琅邪莒人事孫權爲別部司馬守柴桑嘗以二百人大破黃祖兵數千復討臨城南阿山賊有功陟中郎將督校兵及權稱藩於魏魏使刑貞拜權爲吳王權出都亭候貞貞有驕色張昭旣以言折而盛忿憤顧謂同列曰盛等不能奮身出命爲國家并許洛而令吾君與貞盟不亦辱乎貞聞之曰江東將相如此非久下人者也後遷建武將軍封都亭侯

**蓋**字子尼樂安蓋人師事鄭玄後與邴原管寧

避亂遼東及還仕魏爲司空掾屬毋公朝議論常直言正色後遷魏郡太守太僕卿雖居列卿布衣蔬食祿賜散之故舊宗族以恭儉自守

**王儀**字民表北海營陵人脩之子性果正直不畏權勢爲安東將軍司馬昭東關之敗問曰近日之事誰任其咎儀對曰責在元帥昭怒曰司馬欲委罪於孤邪斬之

**是儀**字子羽北海營陵人本姓氏郡相孔融嘲儀言氏字民無上因改爲是後依劉繇避亂江東徙

會稽孫權徵典機密使輔太子太子事先諮詢然後行時典校郎呂壹誣江夏太守刁嘉謗訕國政權怒問同坐人皆怖畏壹並言聞之儀獨言無聞對曰今刀鋸已在臣頸臣何敢為嘉隱自取夷滅為不忠之鬼嘉得免儀不治產業權幸儀舍求視蔬飯親嘗之增俸賜益田宅歎曰使人盡如是儀安用科法為及寢疾遺令素棺斂以時服

**晉任愷**

字元褒樂安博昌人少有識量累遷中書

侍郎晉國建為侍中封昌國縣侯愷有經國之幹

性忠正以社稷為己任武帝器而昵之政事多諮焉初愷惡賈充之為人不欲令入執朝政每加裁抑後充與荀勗馮統承間浸潤謂愷豪侈用御食器遂免官後起為太常不得志竟以憂卒謚曰元子罕以淑行稱歷仕交州刺史大鴻臚

**南北朝劉穆之**

字道和東莞莒人徙居京口從宋

武帝平建業諸大處分倉卒立定累加尚書左僕射帝西討劉毅以諸葛長民監留府疑長民難獨任留穆之輔之加建武將軍穆之內總朝政外供

軍旅決斷如流事無壅滯賓客輻輳求訴百端內  
外諮稟盈堵滿室目覽詞訟手荅牋書耳行聽受  
口並酬應不相參涉悉皆瞻舉後以佐命元勳追  
封南康郡公謚文宣孫瑀仕至御史中丞

**臧熹**字義和東莞莒人熹之弟與熹並好經學隆  
安初兵起熹乃習騎射從武帝入京至建業桓玄  
走武帝使熹入宮封府庫有金飾樂器武帝問熹  
卿得無欲此乎熹正色言曰皇上幽逼播越非所  
將軍首建大義雖復不肖實無情於樂帝笑曰聊  
以戲耳以建義功封始興縣五等侯後以大衆伐  
蜀蜀平遇疾卒追贈光祿勳

**劉休賓**字處幹北海都昌人少好學有文才仕宋  
爲兖州刺史娶崔邪利之女生子文曄邪利之降  
文曄母子俱入魏及慕容白曜軍至休賓不降白  
曜表請崔氏與文曄巡視城下文曄哭泣且以爪  
髮爲信遂降及立平齊郡以休賓爲懷寧令卒孝  
文幸方山文曄求見申父功厚賞屈於是賜爵都  
昌子拜協律中郎謚曰貞

王憲字顯則猛之後仕後魏道武見之曰此王猛孫也厚禮待之爲廷尉卿出爲上谷太守清已率人風化大被後以元老特賜錦繡布帛珍羞醴膳卒謚曰康

王昕字元景憲曾孫少篤學汝南王悅辟爲騎兵參軍悅與府僚飲酒酣暢昕曰商辛沉湎其亡也忽焉累官常侍武帝或時袒露與侍臣戲狎見昕即正冠歛容王氏九人皆風流醜籍世號九龍

王晞字叔朗昕之弟魏永安初徵署廣平王開府

功曹吏晞志願養母竟不受其署母終遨遊鞏洛悅其山水與范陽盧元明鉅鹿魏季景結侶往天陵山浩然有終焉之志昭帝欲以爲侍中亦不受武平初遷大鴻臚加儀同三司監脩起居注性閒澹寡欲雖王事鞅掌而雅操不移在并州雖戎馬填間未嘗以世務爲累

任遐字景遠樂安博昌人父遙齊中散大夫遐少敦學業家行甚謹位御史中丞金紫光祿大夫永明中遐以罪將徙荒裔遙懷名請訴言淚交下齊

武帝聞而哀之竟得免

**隋高構**字孝基北海人性滑稽多知辨給過人好讀書工吏事歷官至吏部侍郎有能聲所舉杜如晦房玄齡等後並致公輔論者稱構有知人之鑑

**孫謙**東莞人仕梁累官零陵太守以老徵爲光祿大夫歷二縣五郡所至廉潔居身儉素牀施籩條屏風冬則布被莞席每朝見猶請劇力自效武帝笑曰朕當使卿智不當使卿力卒年九十二從子廉歷晉陵吳興太守

**唐段志玄**臨淄人性資偉岸以驍果爲秦王所識

從討王世充深入馬跌爲賊擒兩騎夾持其髻將

度洛志玄忽騰而上二人俱墮於是奪馬馳歸尾

騎數百不敢近破寶建德平東都遷秦府右衛護

軍隱太子嘗以金帛誘之拒不納太宗即位奉命

勒兵衛章武門太宗夜遣使至志玄拒曰軍門不

夜開使者示手詔志玄曰夜不能辨比曙帝歎曰

直將軍周亞夫何以加封褒國公卒謚莊肅

**段文昌**字墨卿志玄三世孫素仗義節不爲齷齪

小行裴胃探古今禮要為書數從文昌質判所疑  
李吉甫才之擢左補闕憲宗數欲親用頗為韋貫  
之苛詆偃蹇不得進貫之罷擢為翰林學士穆宗  
即位屢召入思政殿顧問率至夕乃出俄拜中書  
侍郎未踰年自表還政授劔南西川節度使文宗  
立徙帥荆南民為語曰旱不苦禱而雨雨不愁公  
出游帝以文昌得蠻夷心詔使下檄慰責即日解  
去

**王敬武**

青州人中和中盜發齊棣遣敬武擊定授

平盧軍節度使後檢校大尉同中書門下平章事

**諸葛爽**

青州博昌人初入盜為小校後歸唐累遷

汝州防禦使黃巢犯京師詔率代北行營兵入衛  
授招討行營副都統兼中書門下平章事爽雖興  
庸斯善吏治法令澄一人無愁咨累擢檢校司空

光啓二年卒

**五代**

趙鏐青州人幼與群兒戲部分行伍指顧如

大將諸大兒聽其節度及壯善弓劔勇果重義拒  
黃巢有功仕唐為忠武軍節度使鏐卒弟翊代立

乃求鄧艾故迹決翟王陂溉民田兄弟若陳二十  
餘年陳人賴之後卒於家陳人爲之罷市

**牛存節**博昌人初名禮事諸葛爽於河陽爽歸梁  
賜名存節累官千牛衛上將軍晉破梁於夾城存  
節以餘兵歸關晉兵攻澤州存節曰澤州要害不  
可失也累策而先士卒從之至澤州入城助之守  
晉人穴地攻之存節亦穴地應之戰於隧中斃  
解去後爲匡國軍節度使守同州水賊而無非友  
謙與岐兵欲以渴渡之存節禱而鑿井八上水皆

井卒不能下末帝立徙鎮天平梁晉相拒河上存  
節忠憤彌激治軍督士未嘗言病卒贈太師

**劉勣**密州安丘人梁末帝時兖州張萬進反拜勣  
兖州安撫制置使萬進敗遷秦寧節度使

**梁石昂**臨淄人好學不仕節度使符習高其行辟  
爲臨淄令以公事謁監軍楊彥朗贊者以彥朗名  
石更其姓曰石昂昂曰內侍柰何以私害公昂姓  
石非右也即解官去語其子曰吾本不欲仕亂世  
果爲刑人所辱子孫其以我爲戒

宋滕中正字普光青州北海人弱冠舉進士不第周顯德中滑帥向拱奏辟為掌書記乾德五年度支員外郎侯陟表中正有材幹入為殿中侍御史未幾又擢拜諫議大夫權御史中丞中正性峻刻連鞫大獄時以為深文權中丞日振舉綱憲人以稱職許之二子玄錫玄晏並舉進士

**張宏**字巨卿青州益都人父峭平利令宏太平興國中舉進士為將作監丞遷著作郎預修太平御覽歷左拾遺太宗謂宏曰朕自御極以來親擇群

材大者為棟梁小者為榱桷卿與呂蒙正皆中朕選累官吏部侍郎真宗朝命宏於王旦知登聞鼓院再掌吏部選宏脩謹守位不求赫赫之譽歷踐通顯未嘗敗事子可久至虞部員外郎可道國子博士可度太子中舍

**許仲宣**字希榮青州人漢乾祐中進士周顯德初以考功員外郎張又薦為濰州團練判官宋初赴調引對便殿授太子中允知北海軍奏升其地為濰州帝益知其強幹及征江南仲宣兼隨軍轉運

事供饋無闕太宗驛召赴闕授四川轉運使仲宣  
諭以逆順示以威福夷人奉服後爲廣南轉運使  
令征交州其地炎瘴士卒多死仲宣奏罷其兵分  
屯諸州開庫賞賜草檄以諭交人即納款內附太  
宗嘉之後累遷給事中

**李斌**青州人太宗時補御龍直副指揮使坐受秦  
王廷美饋遺貶曹州都校累官萊州洛州團練使  
勤於政理人服清慎至道初拜桂州觀察使仍判  
洛州及代吏民不忍其去鄰境亦上其善政詔書

褒異之

**王子輿**字希孟莒人少業文辭太平興國八年舉  
進士爲北海王簿歷太常博士真宗即位遷殿中  
侍御史充淮南轉運使精於吏事久掌茶鹽漕運  
周知利害裁量經制公私便之後拜右諫議大夫  
**張平**臨朐人初宋太宗尹京兆置其邸及即位召  
補右班殿直監市木秦隴期歲之間良材山積太  
宗嘉其功遷供奉官監陽平都水務兼造船塲舊  
官造舟成以河流湍悍凡一舟調三戶備其漂失

平穿地引水繫舟其中不復調民又以捕盜功改  
崇儀副使遷掌陽平署卒贈上將軍

**于燾**字彭年壽光人博學能文喜言兵慶曆中元  
昊寇邊北虜乘釁聚兵求闕南地丞相呂文靖公  
召燾曰宜治南北行宮若親征者以壓其謀乃以  
大名府爲北都二虜果靖時仁宗春秋高皇嗣未  
立登州岨嶠山數震燾上疏宜早定儲位以安天  
下逮英宗入繼乃由齊邸人以先識稱之

**賈同**字希德臨淄人五代時楊光遠反同祖崇率  
鄉兵保愚谷山全活二千人同篤學好古著山東  
野錄七篇舉進士王欽若方貴盛欲致之不往天  
聖中上言祥符以來予謂造符瑞以欺先帝今宜  
明告天下以正其謬又言寇準忠亮不宜貶出累  
官殿中丞知棣州卒門人謚曰存道先生

**王皞**字子融曾之弟祥符中進士及第召試直集  
賢院嘗論次國朝以來典禮因革爲禮閣新編上  
之又集五代事爲唐餘錄六十卷以獻進直龍圖  
閣及權判大理寺乃取讞獄輕重可爲準者類次

以爲斷例累官刑部侍郎

**楊安國**安丘人光輔子以五經及第仁宗時爲崇政殿說書久之進天章閣侍講學士歷判尚書刑部太常寺卒贈尚書禮部侍郎在經筵二十七年仁宗稱其行義淳實比崔遵度云

**燕肅**青州人舉進士累官龍圖閣直學士歷知數州皆有善政知審刑院寃獄盡釋肅性巧嘗造指南託里鼓二車及歌器蓮花漏人服其精子度第進士累官諫議大夫知潭州孫瑛官至戶部尚書

**明**青州安丘人仁宗朝歷京東益州陝西河東轉運使入知開封府副文彥博討平王則於具州拜叅知政事謚文列鎬安靜有體遇事不苟薛奎稱其沈鷲有謀能斷大事

**朱壽隆**密州諸城人知宿州多劇賊至白晝被甲剽攻郡縣不能制壽隆設方畧耳目捕斬千餘人擢提點廣西刑獄蠻人畏戢屢鹽鐵度支判官夔路轉運使咸有政績復爲京東轉運使歲凶民移壽隆諭大姓富室畜爲田僕舉貧立息官爲置籍